

Kajian Pemuliharaan Hutan terima anugerah Freezailah MTCC

UB 15.12.2023 P.08

KOTA KINABALU: Kajian bertajuk 'Ficus Septica Burm. F. (Moraceae) Stem Cutting Survival Rate in Sandakan Bay, Sime Darby Plantations' dipilih sebagai pemenang Anugerah Kelestarian Freezailah daripada Majlis Pensijilan Kayu Malaysia (MTCC).

Kajian yang dijalankan oleh graduan Ijazah Sarjana Muda Program Perhutanan Tropika Antarabangsa, Fakulti Perhutanan Tropika (FPT), Universiti Malaysia Sabah (UMS), Ooi Yi Wei itu memberi penekanan terhadap pemuliharaan hutan.

Ooi berkata, kajian beliau adalah berkenaan pencarian kaedah yang terbaik, cepat

dan murah dengan menggunakan ranting pokok ara dalam usaha penjagaan dan pemuliharaan hutan.

"Saya menjalankan kajian tersebut di tapak Sime Darby Plantation Sandakan dengan menggunakan ranting batang pokok ara jenis Ficus Septica. Bagaimanapun, kajian ini tidak dapat disiapkan sepenuhnya disebabkan kekangan masa dan keadaan cuaca," katanya.

Beliau berkata, hasil daripada kajian tersebut mendapati ranting pokok ara jenis Ficus Septica tidak sesuai ditanam di kawasan ladang kelapa sawit disebabkan jenis tanah dan faktor cuaca pada masa itu yang kerap kali hujan.

"Walaupun kajian ini tidak dapat disiapkan sepenuhnya, tetapi saya dapati keadaan tanah dan faktor cuaca sangat mempengaruhi pertumbuhan semaian batang pokok ara di kawasan itu.

"Saya menanam ranting pokok jenis yang sama di tapak semaian dan mendapati ia tumbuh dengan baik. Namun, apabila kajian penanaman dijalankan di ladang kelapa sawit pada musim hujan, ranting pokok ara itu tidak dapat tumbuh," jelasnya.

Beliau mencatatkan Purata Nilai Gred 4.0 sebanyak tujuh kali dan menamatkan pengajian dengan Purata Nilai Gred Keseluruhan 3.96.

Ooi menerima wang tu-

nai RM2,000 dan sijil yang disampaikan oleh Timbalan Ketua Pegawai Eksekutif MTCC, Sabrina Mawasi sambil disaksikan Naib Canselor UMS Prof. Datuk Dr. Kasim Mansor dan Dekan FPT, Prof. Madya Dr. Normah Awang Besar.

Anugerah Kelestarian Hutan Freezailah mula diperkenalkan pada 2016 bagi menghargai jasa Pengerusi Pengasas MTCC, Datuk Freezailah Che Yeom.

Anugerah ini bertujuan menggalakkan kecemerlangan akademik melalui pengiktirafan pelajar-pelajar yang telah menunjukkan prestasi yang cemerlang, selain memupuk generasi penjaga hutan akan datang.



ANUGERAH: Ooi menerima anugerah Freezailah daripada Sabrina pada Majlis Konvokesyen UMS kali ke-25.*